

UMNO perlu gandingan baharu

Penganalisis politik berpandangan parti itu boleh jalin kerjasama dengan pembangkang

SHAH ALAM

Senario politik di Perak jelas menunjukkan UMNO harus mempunyai petunjuk dan gandingan yang baharu dengan mengetepikan Parti Pribumi Bersatu Malaysia (Bersatu) dan Pas.

Pensyarah Kanan Fakulti Komunikasi Universiti Putra Malaysia, Dr Syed Agil Alsagoff berkata, ini termasuklah dengan menjalinkan kerjasama dengan pembangkang untuk menyertai gandingan tersebut.

Menurutnya, UMNO berkemungkinan akan menarik beberapa Ahli Dewan Undangan Negeri (ADUN) daripada Parti Keadilan Rakyat (PKR) dan Bebas sekiranya tidak berhajat mengikat hubungan dengan DAP.

"Namun, hal ini sedikit sebanyak memberikan kesan terhadap kerjasama UMNO dan Pas dalam Muafakat Nasional, begitu juga penerimaan UMNO dan Pas terhadap penyertaan Bersatu dalam Muafakat Nasional.

"Petunjuk ini boleh disignifikasi sebagai satu gelombang ancaman politik mutakhir kerana dikhuatiri akan menimbulkan polemik hubungan kerjasama antara UMNO, Pas dan Bersatu di peringkat Persekutuan dan negeri," katanya semalam.

Malah, beliau turut berpandangan,



SYED AGIL



polemik itu berkemungkinan akan terus berlarutan sehingga menjelangnya Pilihan Raya Umum (PRU) akan datang.

Terdahulu, Setiausaha Agung Bersatu, Datuk Seri Hamzah Zainudin berkata, Bersatu akan meningkatkan kerjasama dengan Pas melalui Perikatan Nasional (PN) demi 'kestabilan politik peringkat nasional dan negeri'.

Kenyataan tersebut dikeluarkan selepas Presiden Bersatu, Tan Sri Muhyiddin Yassin mempergeserkan mesyuarat Majlis Pimpinan Tertinggi (MPT) Bersatu pada malam kelmarin.

Dalam kenyataan itu juga, Bersatu langsung tidak menyebut sebarang kerjasama dengan UMNO atau mengenai Muafakat Nasional.

Mengulas lanjut, Syed Agil berpandangan, ketiga-tiga parti itu seharusnya memberikan tumpuan mereka kepada penubuhan Majlis Presiden yang diusahakan oleh Presiden Bersatu sebelum ini.

"Presiden Bersatu mahu menubuh-

kan Majlis Presiden untuk memperkuatkan jalinan hubungan kerjasama antara semua pimpinan parti yang menyokong PN di peringkat nasional dan negeri.

"Namun, kenyataan terbaru Bersatu mahu kukuhkan hubungan politik dengan Pas menunjukkan sandaran kuat parti itu kini bergantung kepada Pas untuk terus memberikan sokongan kepada mereka di peringkat nasional dan negeri.

"Hal ini akan menyebabkan UMNO tersebut dan dilanda paradoks terhadap pengukuhan kerjasama parti tersebut dengan rakan kuatnya, Pas dalam Muafakat Nasional yang telah dimeterai sebelum ini," katanya.

Dalam erti kata lain, katanya, UMNO harus mencari penyelesaian berhubung komitmennya dengan Pas, sama ada mencari jalan tengah bagi menyelesaikan konflik politik melibatkan Pas dan Bersatu.

"Atau meneliti semula hubungan politik dengan Pas dan mencari formula baharu melahirkan bentuk hubungan politik lebih progresif supaya hal-hal pertikaian politik ini tidak berlaku lagi pada masa hadapan," katanya.

KRONOLOGI KRISIS POLITIK PERAK 2008 DAN 2020

KRISIS POLITIK 2008

17 Mac 2008

- Ahli Dewan Undangan Negeri (ADUN) Pasir Panjang, Datuk Seri Ir Mohammad Nizar Jamaluddin mengangkat sumpah sebagai Menteri Besar Perak ke-10.

4 Februari 2009

- Kerajaan negeri PR tumbang selepas 11 bulan memerintah Perak apabila tiga ADUN iaitu Jamaluddin Mat Radzi (Behrang PKR), Mohd Osman Jaliu (Changkat Jering PKR) dan Hee Yit Fong (Jelapang-DAP) isytihar diri sebagai calon Bebas.

4 Februari 2009

- Mohammad Nizar umum pembubaran DUN tetapi tidak mendapat perkenan Sultan Perak, Sultan Azlan Shah Muhibbuddin Shah.

5 Februari 2009

- Sultan Azlan Shah mentahkan Mohammad Nizar serta Anggota Majlis Mesyuarat Negeri (Exco) meletakkan jawatan dan sekiranya enggan maka jawatan mereka akan dianggap kosong.

6 Februari 2009

- Barisan Nasional mengambil alih pentadbiran Perak dengan melantik Datuk Seri Dr Zamby dilantik sebagai Menteri Besar Perak ke-11.

13 Februari 2009

- Mohammad Nizar mengambil tindakan undang-undang memohon mahkamah mengisyiharkan beliau masih Menteri Besar yang sah selain memohon injunsi melarang Dr Zamby daripada menjalankan tugas sebagai Menteri Besar.

11 Mei 2009

- Mahkamah Tinggi mengisyiharkan Mohammad Nizar sebagai Menteri Besar Perak yang sah kerana mendapat beliau tidak pemah mengosangkan jawatan berkenaan dan tidak kehilangan kepercayaan majoriti ADUN.

22 Mei 2009

- Keputusan Mahkamah Tinggi dibatalkan oleh Mahkamah Rayuan yang mengisyiharkan pelantikan Dr Zamby adalah sah dan mengikut Perlembagaan.

KRISIS POLITIK 2020

24 Februari

- Kerajaan Pakatan Harapan (PH) tumbang selepas Perdana Menteri, Tun Mahathir Mohamad meletak jawatan.

27 Februari

- Wakil pembangkang Perak daripada UMNO didakwa menghadap Sultan Perak, Sultan Nazrin Muizzuddin Shah, sekali gus mendedahkan parti itu mempunyai 30 kerusi dan akan membentuk kerajaan.

3 Mac

- Menteri Besar Perak, Datuk Seri Ahmad Faizal Azumu memberitahu beliau dipanggil menghadap Sultan Nazrin di Istana Iskandariah, Kuala Kangsar, Perak.

10 Mac

- Ahmad Faizal meletak jawatan sebagai Menteri Besar sementara Sultan Nazrin Shah meminta ketua parti untuk menamakan calon Menteri Besar.

13 Mac

- Ahmad Faizal dilantik sebagai Menteri Besar Perak ke-13 selepas mendapat perkenan Sultan Nazrin Shah.

4 Disember

- Ahmad Faizal gagal memperoleh sokongan majoriti DUN Perak selepas ADUN Pengkalan Baru (BN), Datuk Abd Manap Hashim mengemukakan usul undi percaya terhadapnya.

5 Disember

- Ahmad Faizal meletak jawatan sebagai Menteri Besar bersama seluruh barisan Exco kerajaan negeri.